



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : [f](#) Tir Yimyim [tir_yimyim](#)

[tir yimyim](#) TAPAK 8



Trump-i cabinet
züngsem ajak shimogo

Djokovic-i pa indang coach
asütsü Andy Murray shim

VOL. XXII ISSUE NO. 46 (ADOK 46) DIMAPUR TENTONÜ (MONDAY) YIMPOKSÜ (NOVEMBER) 25, 2024 ₹ 5.00

NAAC teloki DBC, Kohima semdang

Naik Subedar Hokato aser Team Better Dimapur nem tetushi agütsü

Kohima, November 24, 2024 (Member) lir.

(TYO): National Assessment and Accreditation Council (NAAC), Bangalore-i Don Bosco College Kohima semdanga asadangogo.

March 2021 nung 1st NAAC cycle agiba sülen NAAC-i November 21 aser 22 anogotem Don Bosco College Kohima semdanga liasü.

Iba mapang college Principal, IQAC coordinator aser Head of Departments ajanga power point presentations sayua liasü.

NAAC telokisa kaketshirtem, academic & non-academic staffs, governing bodies, tsüraburtem aser alumni den ajurutepa sensaksema liasü.

Parnoki Don Bosco College Kohima nung Gym, Museum, Economics, University of Mysore, Karnataka Dr. Indira Mahendravada (Member Coordinator) aser Principal F M Autonomous College Balasore, Orissa Dr. Tarani Kara



Dimapur, November 24, 2024

(TYO): November 24, 2024 nü Raj Bhavan Kohima nung Prime Minister, Narendra Modi'er 116 buba Mann Ki Baat sayua liasü.

Tanü 'Mann Ki Baat' screening nung Nagaland Governor La. Ganesan-i Hokato Hotozhe Sema aser Team Better Dimapur

Naik Subedar Hokato Hotozhe Sema aser Team Better Dimapur ajanga bendanga agüja aser lokti tenzükba mapa inyakba atema iba anogomong nung Governor La. Ganesan-i tenüngsang agüja liasü.

Naik. Sub. Hokato H. Sema ya Indian Army Officer aser saisaponger ka dang masü saka tangar ajungmesoba taküm ka lir.

2002 nung linük tenzükba wadang nung lia Kashmir nung bomb agi pa tetsüng ka poktok saka pa tejangraba mesama. Pai sepa nungi para-athlete ka aküm aser 2024 Summer Paralympics, Paris nung shilem agidang bronze medal (shot-put) angu ta Governor Ganesan-i ashi.

Governor La. Ganesan-i tenüngsang agüja liasü.

Iba ya pai bendanga agütsüba kuli lir aser asenok ajak akasodaktsür. Pa tetsüng ka meliaka saisaponger ka ama linük asoshi konang bentsür aruba atema tenüngsang agütsür ta Governor-i ashi.

Governor Ganesan-isa Team Better Dimapur indang jembidang April 2024 nung Dimapur nung annual sports meet for orphanages and children's homes nung shilem agiba bilemteta jembi.

"Iba sentong ya lokti lajartem yaritsü indang osang prokshitsü atema liasü saka kü atemabo awareness campaign ka dang masü saka tanurtem atema sports meet ayongzüksüba ya Team Better Dimapur züngsemtemi temeim aser aria bilemba ajanga atongba liasü ta angatet. Iba jagi sentong nung tongti tesemdanger asütsü mulunga agizük" ta pai ashi.

"Team Better Dimapur-i community service tulu inyaker aser merükmejuba, lipoküm

wazüka ayuba maparen balala inyaka arur. Ibala inyakyim ajanga parnoki tarutsü melenshitsü metsü proka ayur aser tangartem ajungmesor" ta Ganesan-isa ashi.

Asenoki Hokato aser Team Better Dimapur amala nisungtem kanga nüngdaker, ta paisa shisem.

"Tanü asenoki parnok nem tebang agi dang masü saka mapa agi tetushi agütsür. Parnoki inyakba mapatem pusema nungiter aser parnok otsü ajanga maneni asenoki bendanga agüja aser aria bilema lokti tenzütsü akasodakjingga" ta Governor-isa metedaktsü.

Iba sentong nung Commissioner and Secretary to the Governor, Rajesh Soundararajan-i 116 buba 'Mann Ki Baat' osang lemsatep aser CEO, DMC Thungchanbemo Tungoe, Information Secretary, TBD Bambi Kevichusa, Director Youthnet Nuneso Chase aser Hokato Hotozhe Sema nungeri o tatsütsü jembia liasü.

Tanü nungi Parliament Winter Session tenzükter

New Delhi, November 24, 2024 (Agencies): November 25 nungi Parliament Winter Session tenzütsü aser December 20 tashi nung senden 19 tashi alitsü.

Narendra Modi-i aniba sorkari Winter Session nung Waqf Act yanglughitsüba dena bill 16 tashi benoktsü renema lir.

Külen, Opposition-i Centre sorkar dang Parliament nung Adani Group ajanga süpokrem

Hornbill Festival atema 'official song' sayaogo

25 years of Hornbill Festival
COME TOGETHER
TRANCE EFFECT



Kohima, November 24, 2024 (TYO): Task Force for Music & Arts (TaFMA)-i 25 buba Hornbill Festival 2024 atema official song sayaogo.

Iba ken ya "Come Together" lir aser Trance Effect ajanga mapa tajung inyakogo ta TaFMA-i ashi.

Trance Effect band ajanga "Clowns, I am on your side" aser "Overrated" kentem ajanga

Jharkhand nung Soren saka Maharashtra nung CM shimba osang malí

New Delhi, November 24, 2024 (Agencies): Jharkhand Assembly elections nung Jharkhand Mukti Morcha (JMM)-i aniba teloktepi takok tulu anguba sülen Hemant Soren-i November 28 nü Chief Minister inyaktsü atema tezungzüktep agitsü.

November 28 nü tezungzüktep agiba sentong agitsü renemogo, ta Soren-i tanü Raj Bhawan kima nung osangbener dang ashi.

Jharkhand nung MLA tem senden ka amenba sülen Soren-i Deobar nikongdang 4:00 ako meta Raj Bhawan nung oa Governor Santosh Gangwar den ajurutep.

Idangi Soren-i Chief Minister menden toktsüba shidi den MLA 56-i sorkar pusemba kulitem agüja liasü.

Governor Gangwar-i Soren shidi agizük aser sorkar tasen ka maküm tashi caretaker Chief Minister inyaktsü shima liasü.

"Tanü nungi onoki sorkar

tasen akümtsü mapa tenzükogo aser iba nung shilem ka ama onoki tang teinyakdak menden nungi anenba shiditem agütsüogo. Onoki sorkar tasen akümtsü atema kulitem agütsüogo. Governor-i kü nem interim CM inyaka atatsü lemzütsü aser sorkar akümtsü jaokogo" ta Soren-isa ashi.

Jharkhand Assembly election nung Hemant Soren'er JMM-i anir INDIA bloc ajanga menden 56 nung aser NDA-i menden 24 nung takok ngua liasü.

Maharashtra nung Mahayuti teloktepi menden 235 nung takok angu aser iba nung BJP kijai menden 132 nguteta largest party lir.

November 25 nü tezungzüktep agiba sentong agitsü imlar ta Shiv Sena lennir Deepak Kesarkar-i Deobarnü ashi.

Asüng Maharashtra chief minister aser deputy chief minister tem dang tezungzüktep agitsü aser

cabinet nung shimoktsü atema telemtetba kecha magi ta osang angazükter.

Eknath Shinde aser BJP lennir Devendra Fadnavis rongnung kati Chief minister inyaktsü saka tena rongnung shiba shimtsü ano memetetdaktsü lir.

Honibarnü osangbenertemi asüngdang Shinde aser Fadnavis naprongi Mahayuti nung dena alirtem den asüngdangyaba sülen chief minister shimtsü ta langzüa liasü.

"Shiba Chief Minister südir mangatetep kecha madoktsü. Iba ya mezüng anogo nung lemteta lir" ta Fadnavis-i ashi.

"Mahayuti teloktepi aser BJP lenisüba ajanga taruba Chief Minister lemtettsü" ta Maharashtra BJP president Chandrashekhar Bawankule-i ashi.

Külen, Pune NCP president Deepak Mankar-ibo party züngsemtemi Ajit Pawar nem Chief Minister inyakdaktsünür ta ashi.



Kohima Longpok Semchir Telongjem mezüng lokti senden November 23, 2024 nü parnok kimen Wb. Shringain Longkumer (Speaker, Nagaland Legislative Assembly)-er kidang menogo. Iba senden nung Kimen aser pa kinungtsü den Wb. Moatoshi Longkumer (MLA) aser Nucleus Longkumer(MLA) na dena agiba noksa ka yangi angu

NITI ajanga state nung Morung Scholarship Test agi



Dimapur, Yimpoksüi/Nov. 24 coaching program tem nung scholarships 100 shilem agütsür. Iba sentong yagi NITI ajanga Nagaland nung aliba kaketshir nem state telungzük nung shisaliok tajung den career yangertsü maongka agütsür aser mejangjaba tesem nung oa alitsü aser azüngtsü tebilemtsü ajemdaktsür.

Nagaland nung aliba kaketshirtem state yutsür moi coaching facilities tajung anguba nung aiben tayongzükba balala ajurur, anungji NITI indang Morung Scholarship Test yagi iba tetsüngta nung apu laja kaketshir temi nüngdakba ama coaching sentong tajung agütsür.

Iba sentong ya ajanga NITI-i kaketshirtem national level nung timtem makai tokteptettsü maongka agütsür.

Dimapur nungi iba Morung Scholarship Test nung shilem agir kati, "Iba scholarship ya temoatsü ka lir. Iba ya ajanga ni ozü kibong aser ki yutsür aotsü

tebilemtsü makai NEET atema renemettettsü," ta ashi.

Nagaland nung scholarship test aser STEM education temaba jenjangi ajungketba atema All Nagaland Private Schools Association (ANPSA) nung taoba tir Bithungo Kikon ia NITI nem tentingsang agütsü.

STEM dak sendakba seminar aser tests tem ayongzükba nung yaitepba aser amalitep akaba atema NITI ajanga Dimapur nung aliba The Maple Tree School, St. John's Hr. Sec. School, St. Mary's Hr. Sec. School, S.D. Jain Hr. Sec. School, Pilgrim Hr. Sec. School, Ram Janaki Hr. Sec. School, Pranav Vidyapith Hr. Sec. School, Livingstone Foundation International, Govt. Hr. Sec. Schools, Neingulie Memorial School aser Jawahar Navodaya Vidyalaya management aser tesayurtem dang pelaba NITI Academy ketdangsür Ajay Sethi, MD ajanga lemsatepa liasü.

Science stream azüngtsü jangraba Class VIII nungi XII nung kaketshir temi NEET & JEE exams asoshi coaching aser crash courses agia renemtsü asoshi Morung Scholarships ya agitetsü. Sempet balala indang hopta ka lir sangdongtsü aser iba mapang kaketshir nem counselling agütsütsü.

Printing & Stationery Directorate annual picnic agiogo



Kohima, Yimpoksüi/ Picnic sentong agiogo.

November 24 (TYO): Küm tatem sentongtem nung shilem ka ama Directorate of Printing & Stationery, Nagaland-i ayongzüka tanü Sachü Badze D. Khel, Kohima nung Staff Annual

aotsü atema department akümtsübutsu ajungshia liasü.

Honibarnü picnic sentong nung staff 200 shi-i shilem agia liasü. Anogo tepeyong asaya balala ayongzüka asayaogo aser lokti chiyongba mapa agia liasü.

ANCSU-i Ketsodi Ltu asükhü lemsatep

Dimapur, Yimpoksüi/Nov. 24 (TYO): ANCSU tenteter aser Tribunal General All Nagaland College Students' Union & Chairman Election Commission ANCSU 1992-1995 inyaker Ketsodi Ltu anojungi November 23, 2024 arishi tembangba osang angazüka asükhü lemsateper, ta All Nagaland College Students' Union (ANCSU) sangdong ka ajanga ashi.

Kaketshir ajungtsü asoshi Ketsodi Ltu-i asadangtsü makokba mapa tajung jenti bendanga agütsür inyaka lir. Pa dak lenisüba sempet tajung, nüburtem asoshi bendanga agütsüba kodanga mamadoktsü, ta ANCSU-i ashi.

Tanü lokti tentet balala aser

Cookie-i Noah's Ark pet carnival fashion show kokogo



Noah's Ark pet carnival Fashion show akokba azü Cookie aser kibur Mimi Khuvung na tangokba noksa nung angur.

Dimapur, Yimpoksüi/ November 24 (TYO): Ita tekutain Shih-apso azü Cookie, shiba Chinese doll ama sobur liasü, iba azü yagi Noah's Ark pet

carnival fashion show kokogo, koba November 23 nü Trinity Tower Indisen Village Dimapur nung agia liasü.

Iba tetoktepba akoker nem Veterinary Health care Center proprietor Dr. Ekon-i sponsor süa sempet agütsüba den, fur mamas nungi angati spa aser Kiko Nagaland, Kiko pet shop, mini pet café amala nungi gift hampers aika agütsüogo.

Tanabuba aser tasembuba jenjang nung tembangertem nema sempet den gift hampers agütsüogo aser sentong nung shilem agir ajak nem gift



Chenmoho yimtsüng nung tantsür ka tenem nungi mekaba osang angashia Assam Rifles nungi Quick Reaction Team den medical personnel temi oa yirur alila nem first aid agütsü aser lar kinunger tem makamaitba ajiteta District Hospital Mon tashi meinoktsü aser senotsü teyaria agüja liasü. Assam Rifles ajanga mapa tajung inyakba ngua Chenmoho yimtsüng nung alir temi parnok dang pelaba lemsatep.

Asükwa mongpu Parliament jakdang party ajak senden amen



New Delhi, November 24, 2024: Asükwa mongpu Parliament tenzüksü anogo ka jelia Amongnū sorkari ayongzüka party ajak senden nung Union Minister of State (Independent Charge) for Parliamentary Affairs Arjun Ram Meghwal, Union Minister of Parliamentary Affairs Kiren Rijiju, Union Defence Minister Rajnath Singh, Union Minister aser BJP National President JP Nadda, Union Minister of State for Parliamentary Affairs L Murugan aser tangartem adenba noksa nung angur.

New Delhi, Yimpoksü/ November 24 (Agencies): Hombar nungi tenzüka asükwa mongpu Parliament tenzüksü lia Amongnū sorkari party ajak senden ka ayongzüka amen; senden nungji sorkari party ajak dang senden junga katettsü atema amalitepdaktsüner, ta mepishi.

Opposition-i US nung agency kati Adani group nem sübokrem tai tonglokja aliba onük nung o lemteptsü atema takhangba agütsüba mapang Amongnū sorkari, House anaprongla nung business advisory committees-i Parliament nung kechi onük nungsa o lemteptsüar telemtetba agütsü, anungji senden junga agitettü atema party ajak nem inyakdaktsüner, ta mepishi.

Ruling party nungi lenirtemi yimtenren party balala nungi lenirtem den senden amenba sülen osangbenertem den jembidang Parliamentary Affairs Minister, Kiren Rijiju-i, sorkari party ajak dang Parliament junga katettsü atema amalitepdaktsüner ta mepishi.

Opposition-i Adani ken o atema jembitsü takhangba agütsüba dak sendakba nung tasüngdangba ka langzüdang

Rijiju-i, House ana nungi Business Advisory Committees-i Lok Sabha Speaker aser Rajya Sabha Chairman na den jembitepa Parliament nung jembitsü onüktem atema telemtetba agütsü, ta metedaktsü.

Party ajak senden nungji Congress MP temi Adani groupi sübokrem amshi ta tai tonglokja aliba aser Manipur nung tensa mejungi aliba atema süoka liasü.

Congress lenir Gaurav Gogoi-i, party-i Parliament nung Adani group indang aser Manipur nung rara indang o lemtepner, ta ashi.

Paisa, Jharkhand nung chief minister bo apu saka Manipur nungbo maneni lisopur tsüngda rarayonga chief minister pa menden nungi manendaktsür, ta ashi.

Opposition party-isa Delhi aser temeket nung mopung kanga menenba aser linük nung train lendong kanga bulua atalokba atema o lemteptsü takhangba agütsü.

Congress lenir Pramod Tiwari-i, Hombar nungi Parliament tenzüka anogo nung mezüng Adani nem tai tonglokja aliba onük nung o lemteptsüla, ta takhangba agütsü.

Rajya Sabha MP, Tiwari-i,

"Iba ya linük rongsenkettsüng dak sendakba nung tongtibang onük ka lir, kechiyong company jagi solar energy project agizüksü atema ozüng alema sen crore 2,300 yimtenren lenirtem aser ketcangsertem nem sübokrem agütsü," ta ashi.

Party ajak senden ya Parliamentary Affairs Minister Kiren Rijiju-i ayongzüka liasü. Iba senden nung BJP Tir J P Nadda, Congress lenirtem Jairam Ramesh aser Gaurav Gogoi, T Siva, Harsimrat Kaur Badal aser Anupriya Patel nungera densema liasü.

Asükwa mongpu Parliament Hombar nungi tenzüka sülen December 20 nü tembangtsü. Sorkari Waqf Amendment Bill densema bill 16 benoktsü tebilemba lir.

Tan mongpu senden nungsa 2024-25 kümsük atema First Batch of Supplementary Demands for Grants, Punjab Courts (Amendment) Bill, Merchant Shipping Bill, Coastal Shipping Bill aser Indian Ports Bill benoktsü.

Waqf (Amendment) Bill aser Mussalman Wakf (Repeal) Bill densema bill 8 Lok Sabha nung anendaka lir aser Rajya Sabha nung bill ana anendaka lir.

Nov. 28 nü Jharkhand nung Hemant Soren-i CM tenangzüka agütsü

New Delhi, Yimpoksü/ November 24 (Agencies): Jharkhand Assembly elections nung takok tulu anguba sülen aliba Raj Bhawan-i ao aser chief minister teinyakdak Soren-i sorkar tasen akümtsü atema menden nungi anenba shidi agütsü.

November 28 nü Soren-i

Chief Minister tenangzüka agütsü. Jharkhand nung assembly menden 81 nungi JMM-i aniba teloktepi menden 56 tashi nung takok angu.

Bharatiya Janata Party (BJP)-i aniba teloktepi menden 24 dang ngua liasü.



Jharkhand Assembly election nung takok anguba sülen November 24, 2024 nü Ranchi nung Jharkhand Chief Minister aser Jharkhand Mukti Morcha (JMM) lenir Hemant Soren, Jharkhand Congress In-Charge, Ghulam Ahmad Mir aser tangartem INDIA teloktepi lenirtem senden nung adenba noksa nung angur.

Mahayuti nung Chief Minister menden rakteper mali: Devendra Fadnavis

Mumbai, November 24

(Agencies): Honibarnü Maharashtra nung assembly election votes zünga osang sangdongogo; iba election nung BJP-i aniba Mahayuti teloktepi takok anguba sülen Amongnū Maharashtra deputy chief minister, Devendra Fadnavis-i, Mahayuti nungi Chief Minister menden rakteper mali, ta metedaktsü.

Osangbener den jembidang Fadnavis-i, "Onoki takok tulu nguogo. Iba ya tzüsem tuluka ama liasü aser opposition samatsüogo, ajisüaka Chief Minister menden rakteper mali. Chief Minister tasenbaji shiba asütsüar Shiv Sena, NCP aser BJP nung bangdak lenirtemi telemetebta agütsü," ta metedaktsü.

Fadnavis-i, Mahayuti-i takok anguba ya Maharashtra nung nübertemi Ato kilonser Narendra Modi lenisüba dak temelung lemtetba agi lir, ta ashi. "Atangji Lok Sabha elections nung (Maharashtra nung) onoki menden aika mengutet. Lok Sabha election agiba sülen ang nübertemi 'telesma adokdaktsürtem aser linük anemertem' BJP anema inyaker' ta rateta liasü. Parnoki mangyangogo aser Mahayuti nem vote agütsüogo. Modi

lenisüba nung tamang katetba atema onoki Maharashtra nung nübertem dang kanga pelar," ta paisa metedaktsü.

Fadnavis-i, Modi indang yimyim 'ek hain toh safe hain' den küleme state nung Ladki Bahin scheme ajanga onoki takok angu, ta pai ashi.

Paisa, "Ladki Bahin scheme ya atangji mapa küma benok aser tarutsü nunga lateta aliba ama senotsü teyari shidak agütsü. Sorkar tasenbai tang teinyakdak terenlok project ajak mapang shidak nung renemtsü," ta metedaktsü.

Honibarnü Maharashtra Chief Minister Eknath Shinde, "State nung ladki bahins (temeim aianutsür) aser adianutem aikati onok nem vote agütsüba atema ni ajak dang pelar. Onoki terenlok mapa inyakba ajanga aikati onok nem vote agütsüogo. Onoki inyakba mapatem nübertemi nguogo aser votes ajanga telangzüba agütsüogo," ta metedakja liasü.

Fadnavis-i, "Rahul Gandhi indang Bharat Jodo Yatra mapang nung yimsü aser kin nung ajemdaker telesma adokdaktsürtem meranga liasü saka Modi indang yimyim 'ek hain toh safe hain' ajanga item ajak madak takok angu," ta metedaktsü.



November 24, 2024 nü Patna nung 'Save the Constitution and National Unity' conference nung Jamiat Ulema-e-Hind Tir, Maulana Syed Arshad Madani-i jembidang tangokba noksa nung angur.

US SEC-i Adani indangindanga jaoktsü makok

New Delhi, November 24

(Agencies): Solar energy contract tulu angutsü atema sen crore 265 sübokrem agütsü, ta tai tonglokja aliba ken o dak sendakba nung US Securities and Exchange Commission (SEC)-i Adani Group tentetsang, Gautam Adani aser par adianu chir, Sagar Adani na indangindanga jaoktsü makok saka ketcangsertem tsüngda lateta aliba inyakyim ajanga dang inyaktsü akok, ta osang ka ajanga metedaktsü.

Bendangertem indangindanga jaoktsü SEC nem jurisdiction tashi agüja mali, anungji parnoki Adani jaoktsü atema US nung aliba Indian Embassy nem temepishiba agütsü akok, ta kasa osang ka ajanga metedaktsü.

Item ama inyakyim ya 1965 Hague Convention nung lateta liasü aser India o US na tsüngda Mutual Legal Assistance Treaty

nunga lateta lir.

Jaoktsü atema shidi dang agütsü makok saka inyakyim aika benshitsüa akümtsü aser ibaji ajanga mapang talangka agütsü.

November 21 nü SEC-i tejaokba agütsü aser New York court nung ken o benoka anogo 21 tsüngda telangzüba agüjang ta tuyua lir. "Nai telangzüba magütsü obendangji na anema asütsü," ta notice nungji shia lir.

Gautam Adani den par adianu chir Sagar aser Azure Power Global nungi Cyril Cabanes densema tangartem 2020 küm nungi 2024 küm tashi nung solar energy contract tulu angutsü atema sübokrem agüja lir, ta parnoki nem tai tonglokja lir.

US Attorney, Breon Peace-i, "Kü office-i international marketplace nung ochimashi tera nungi atsüdoktsü atema inyaktsü," ta metedaktsü.



TIR YIMYIM

YIMOBILEM (EDITORIAL)

DIMAPUR TENTONÜ, NOVEMBER (YIMPOKSÜ) 25, 2024

Alima tongpang rara asembuba

Tang alima nung kin o kin na raraba agi alima kintem ajak menatepa oagi alima ajak rara akümtsü ana nung aliba raraji Russia o Ukraine na rara ya asütsü. Atangji, khen bilemtsü agibo Russia o Ukraine nabo medemdagtsüla masü, Russia-sa tashi tuluba, iba jagiang Ukraine amak tenzükba mapangbo Russia tir Vladimir Putin-ibo Ukraine ya pai anogo ter nung agiadoktsü ta metedaktsü saka anogo ter agi anogo meyi ka kümogo aser tang tashi ano kasa tongpang nung nokdaka lir. Aji oda, Russia o Ukraine na rara ya tena kija reraba tongpang masü saka Ukraine pu asemer NATO, European union aser US külen aser Russia pu asemer Iran, China aser North Korea külen ta ser raraba tongpang ka küma odagi. Atangji, US tir tasenba Donald Trump-ibo pa tir mapa agizükli pai Russia - Ukraine rara ya anendaktsütsü ta metedaktsüogo, ajisüaka pa sangküm January 20 nü nungiag tir mapa agizüka bener aotsü alinungji, iba anogo matongdang alima nung kechi ataloker alitsüar memetetba tensa tia ka nung tang ya odagi. Tetsübutüsü aser tarendaktsü kaji Putin-i 'hypersonic missile' tendanga Ukraine nung yimtitem poksatsütsü tenzükba ya lir. Aji oda, Putin-i alima ka nungi ka poksatsütsü yokba bomb tesashi Inter Continental Ballistic Missiles (ICBMs) amshitsü tenzük nungbo Russia lima nungi kilometer 5500 shi pilar aliba yimtitembo parnoki Russia nungi repranga lia US dak alaka European limatema aika poksatsütetsü. Atangji, Russia-i Ukraine makokbaji tapi agi masü saka US, NATO aser European Union-temi yariba ajanga lir. Aji oda, Ukraine-i US aser UK agütsüba osettem amshia Russia amakba agi Russia-a kanga akoksadagi aser joko mamshinüonga yimti ka ajunga kenyongi samatsütsü akokba hypersonic missile, koba dang parnoki Oreshnik missile ta ajar, iba bomb tesashiji amshi tenzükogo. Joko, alima kin ana rara tenzükba nungi tepu semtepa alima kintem tsüngda raraba amai akümer asünungji, Putin-i US anemba kintem den yariteptsü meranger aser parnoki nungi teyaria meshir. Aji oda, North Korea nungbo Russia yaritsü atema Kim Jong Un-i sepai 10,000 yokogo ta angazüker. Ano külen, US tsükchir Iran den yariteptsü asoshi Putin-i inyakba mapatema angashir. Iba lagi Ukraine den dang masü saka rara ya manenra memenui Russia o Israel na tsüngda rrarar amai raratsü ana nung dang lir. Joko, rara tesashiba akümba agi Ukraine nungbo tatar senden amentsüa arendaka kümogo, anungji mamener. Iba ama mapang ka nung US, UK aser NATO nung aliba kintemi Zelensky nem pa nüngdakba raraba osettem agütsür Russia makdaktsüra, atangji, aji alima tasembuba rara tongpang tetenzüker asütsü. Ukraine-i Russia amaker masü saka Russia-i Ukraine amaker, anungji Russia-i Ukraine makok ser rara anentsübajı Russia asoshi alima tsüngdang maksü asütsü aser raraji Ukraine-i akok amai akümtsü. Russia-i aji meteta lir, anungji lai makok manentsü. Ano, külen Zelensky ya tangar amato mapang tamajung nung tsükchir tsüngdang pei lima aser nübor tem toktsür jena aotsüba lenir ka masü, pa süra par lima nung asütsü. Aji oda, ajentsü ka asübo Russia-i amak tenzükli US nung oagi ayonyonga oa jenokla. Atangji, Zelensky imlaba amato US aser NATO kintemi Russia-i amak tenzükli Russia anema nokdak asübo rara ya anener lila. Ajisüaka, teyarir masü aser meyarir masü ta Zelensky timtem nung toktsüba agi Russia tasü taitba kümogo, Joko, külen Israel o Hamas na tsüngda raraa-raraa Israel nungertemi Hezbollah alidak Lebanon yimtiba Beirut tashi oagi makdagı aser Ukraine-a tangari agütsüba raraba oset amshia Russia amaktsü tenzüker, kechiyong parnoki atema Russia nem makdaktsütsü asataa alitsübajı lendong tuluba atar asütsü. Joko, yimjung lenmang ka melapoktetra, anogo ishika tsüngda ya alima nung Ukraine alitsü asü mesüra Russia alitsü ta asüba telemtetba tasak ka agitsüsa alima kintem madaki arutsü, idangjibo Putin ket nung aliba tashi ajak chiocksüsa akümtsü, kechiyong asütsüka sura pa asütsü aser kümra pa akümtsü ta asüba tensa tia ka nung pa nokdaka lir.

OLEMSABANG

ONOK KÜLEMI NÜ TENÜNG NUNG SENTEPER

~ L. Kika Pongener.

(Yashi adok nungi...)

Saka telok karibo aibelena angateter ozüng alema tashi mangai inyakba ngua aruogo.... "Tashi angabaji tetepsetba tenla dang nungi tajungba" (1Samuel-15:22). Lim arogo nung sobalibai memelaba aser kin-kidong melembuyim asüba agi 'Sadi küli' magütsüba.... Telok karibo mashishi-i dang agütsüba-a angazüka aruogo. Koba telok sudir suang.... Sobaliba, yimden aser loktiliba den, tim mapa nungpo liromedema/amaalitepa alitsü kanga tongtipang lir. Kechi telok sudir suang, tazükba nung alitsü kanga tongtipang lir. Küm ishika suiogo, telok kabo nubur aika temoatsü kanga ngua, nubur aikati kanga sapua oa dena aliba.... Tesasatsüka, sen nung mettsüdaker alanger.... Kibong dena raksar tobur mejungi tembangba denjia aruogo. Ano tawa-tanü telok kabo, lennir kari sen tajangzük bushiba mapa nung nubur aika ashioktsüba otsü/osang 'Social Media' nung nguogo.... Koba telok sudir suang... Nuburtemi tamang kaatettsüsa, nuburtemi mashishitsüsa aser nuburtem memettsütakdaktsütsü kangasa tongtipangba sudaktsütsüla.

Tanü lim arogotema ajak khen meyipa reprangshitsüba mapang kati menepogo. Kanga tesasatsüka, lim arogotem aika nung rongsen ketdangsuba mapa nung ochimashi inyakba angur aser tansutsü/maaksutsü mapatem atalokba angudang kanga sasar. Iba ama rongsen ketdangsuba nung ochimashi aser tansutsü/maaksutsü mapatem atalokba otsü/osang lagi asen nubur ajunga alima matsüngdang tejak kanga metenteter. Arogotem aika nung tenzüker shimyim nung tashishitsü keta inyakba angur. Tanü lim arogo kar nungpo arogo sentongtem nung arogopur rongnung laishir aser lai-mashir tsüngda bendanga amshia-a alitsü akok. Baptist distinctive nung.... Tamanger shiaji Putir ka-ka (Priesthood of all Believers)...ta shia angur. Anungji Khristar arogo nungpo arogopur rongnung telemsa meli-i longjema alitsü atema, pei sempet yari shilem agi atadaktsütsüla. Aji oda, arogopur ajak pei sempet yari shilem agidaktsüra, ashiko, pei arogo toktsür tanga telok sentepi maotsü sudi. Ano arogotem nung rongsen ketdangsuba nung tang amaisa tansutsü mapa atalokra.... Ashiko, arogopur tenla agütsür aika malitsü aser sentepi arur aika malitsü.... Mekümdangra lim arogotem nung telemsa adoktsüa kecha meteta maka.

Arogo ka tanela nung aintsüba aser taküm iidaktsütsüba ya nutsüngsuba, tanela anir aruba, tenyaba mapa aser sayutsüngiba kija agi taküm alir masü.... Hau-nii itemja kanga tongtipangba lir.... Saka arogopurtem nubu, shisatsü, tershilem/tamang tenla agütsüba agi arogoji taküm iidaktsür, terenlok mapa-a inyaker aser toklang tenzüker nema itesen agütsür. Kechiyong alima asünungji arogo ka taküm iidaktsütsü asoshi rongsen nungdaker. Pulpit nungi sayutsüngibaji temulong meyiper, tekümtet kar, kodaki aotsü indang sayutsüngir. Ajisuaka, ketdangsuba mapa/inyakyim shitak meinyakra, kodaki mao tsüngda arogo nung mepetmesu adoktsü. Arogopur ajak tamang liromedema aintsü aser longjema ayutsü asoshi pei sempet yari shilem agi atadakja, longjema ayutsü kangasa tongtipang lir. Anungji toklang tenzükteremi kanga shisa kaa arogoji anitsüla. Aji oda, inyakyim shitak asünungdang tanela mapa-a jangrotsü aser kodaki aotsüsa renemetettsü. Ano arogopur ajaki tershilem tenla yabo koba arogo nung asenok tanela chiyungtsü angur iba arogo nung agütsütsüla. Anungji koba telok nungpo madentsüla (?) Koba telok-ibo maotsüla (?)...ta asübajı tongtipangba masü.... Arogo-a suang, mesura koba telok sudir suang.... Koba telok nung Tsüngrem mulongba ama inyaker (?) Koba telok nung Tsüngrem sentong atalokdaktsür (?) Mesura koba telok nung Tsüngrem dena lir (?) Iba-jiang ajak dang nungi kanga agi tongtipangba sudaktsütsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeri angateta agitsü mepishir**

Kenya nung Global Member Care Network senden nung missionary 350 aden



Kenya nung 4buba Global Member Care Network conference nung adener missionary tem tangokba noksa nung angur.

November 24, 2024: Tawa inyaker, ibayongji tesem tasen mission mapatong balala nung kati oa yangji aliba nisungtem amalitepa inyakba den külemi den yimya sübaa alitsüji kanga missionary tem anepalur. Yamaji Movement for African tasak, ibayongji shimang aser shisatsü nung anibelem jenti National Initiatives (MANI), ajurur, ta ashi.

"Parnoki international teams den külemi inyaker, anungi oshi tsütsü timtem ajurur, sobaliba tsütsü timtem ajurur, mission filed nung parnok chirnurtem anitetsü kanga tasak. Anungji

missionary tem tsüngda kati ka anepaluteptsüji kanga tongtibang. Iba kübok tesendaktep yangluba, shisatsü aser taküm junga alitsü atema rangloker inyaker," ta pai ashi.

Paisa, Member Care Network nung kanga tongtibang süa rangloker inyakba rongnung kaji- tesem tasen ka nung missionary chirnurtem anepaluba lir, ta ashi.

Hoffman-i missionary ka kibong taküm otsü lemsatepa liasü- tsüraburtem North Kenya-i oa missionary mapa inyakbayong tanurtem school mezungtetba indang pai metedaktsü.

Tesülen missionary jagi missionary tem chirnurtem anepalutsü atema African Missionary Kids Ministry tenteta liasü.

Iba conference omenji 'Caring for the Harvest Force' liasü aser iba omen kübok missionary tem network partnerships yangluba den külemi tayongzükba balala koktetsü atema tebilemba balala lemsatepa liasü.

Hoffman-isa, Nigeria aser South Korea nung member care networks kanga renlokogo, anungi parnoki China, Indonesia, Ethiopia aser Burundi ama linüktem den parnoki ajangshiba balala lemsateptsüla, ta ashi.

Item ama networks ya linük sasep nung dang masü saka region nunga item ama missions networks tenzüksüla ta parnoki bangjem. Tatitshitsü agi, Latin America nung COMIBAM-i region nung

Osangbener den jembidang Global member Care Network co-ordinator aser iba conference convenor, Harry Hoffman-i, missionary tem meimlaba timtem aika ajangshir aser itemji angatettsü kanga tasak mesüra item tebilemtsü bentettsüji tasak, ta ashi.

Paisa, missionary tem teimbaka sobaliba khenyongi balala aliba tesemtem nung lia

ANOGO ABEN TSÜNGREM DEN

Meshitettsü aser yok

Ochi nung parnok meshitetjang: Ne O ochi lir. Nai kechi koda alimai ni yok, yamaji Nia parnok alimai yoker. Yohan 17:17-18.

Tsüngremi teti na meyokdang tama meshitettsü. Tebui nütsüng tera ana shimetet aser temeshi ochi, Pa jabaso ajanga meshitettsü. Parnok Yisu den sendaktepa ali nung ochi agi (Yn. 14:6) nütsüngtemi ochi ajanga aser osangtajung sayutsüngitsü asoshi renemtsü. Yisui parnok tejangraba jazük (challenge) (Luke 9:46-48), parnok tamang ilaba indang ashi (Matt. 17:19-20), Satan arutsü (Matt. 16:23), aser parnok asükümba aitsü (Matt. 26:33-35). Kodang Yisui parnok renemtsüba atema alimaji aki ama malitsü saka melenshidaktsütsü ain agütsür Pai parnok alimai yok. Temenen Tsüngrem tsüngdang na tamakitsü kümdaktsü ta Satani puatsü akok. Tiyazü tulu nungi ibaji tiyazü aruba asütsü. Nai temenen menali Tashioktsübä "Nai tamakok nguogo. Na tang joko Tsüngrem tsüngdang takidak maka" ta ashitsü. Iba yagi Khristan ka dangi tamakokji tali shisanga aser tali teyimla makaba kümdaktsütsü. Aji saka, Tsüngrem tanelka nüji kümdaktsüba kecha dena medemdangtsü makok. Kodang Tsüngremer nüburu Tsüngremer ochibaji Tsüngrem mulungba nung ayutsü mulungtetdir, idangji Tsüngrem ainji mezüng nütsüngtem nem agütsüba ama parnok ajanga kasa yoktsü.

Ochibaji na nüji kümdaktsütsü. Ochiji "Asenoki asen temenen nangzükra, asenok dang asen temenen adoktsü aser memeshiba ajak nungi asenok merükdaktsütsü, Pa temulung lemtetba aser ochi lir" (1 Yn. 1:9), aser asenok Tsüngrem asoshi alitsü agizüker.

Pope Francis-i Dec. 15 nü Corsica semdangtsü

Vatican, November 24, 2024 (Agencies): Pope osangkaket ka nung Francis-i December 15 nü Hokolbarnü ang iba osang Corsica asetkong semdangtsü,

aser ibaji tang mezüng Pope kati French Mediterranean nung aliba asetkong semdanger asütsü, ta Honibarnü Vatican-i metedaktsü.

Corsica asetkong yimtiba, Ajaccio semdangba mapang Pope Francis-i lokti senden ka nung jembitsü. 2013 küm pa

Pope akümba sülen tang tashi nung pai bendang balala semdangba 47buba asütsü.

Corsica ya tenem aser tzükong aika aliba asetkong ka lir. Iba asetkong ya Napoleon asoba tesem lir aser Mediterranean nung asetkong tulutibatem rongnung jenjang pezübuba nung lir.

France kübok kanga sensakba region rongnung Corsica densema lir. Corsica nung nütsüng lakh 3.56 lir aser iba nungjagi nütsüng shilem 20 bo kanga sensak tia nung lir.

Pope Francis-i Corsica semdangtsü aliba atema hopta nütsüng shilem 81.5 bo aika jelia Corsica-i renemdar, Catholic Khristantem lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tashikar

(n) tashi tulu aketba nisung (strong man/woman)

* Tashikar nisungtemi lung tulu bendena lung jara yanglu.

Tashionshi

(adv) chiyongtsü tapayu mali mashi mashi amshiba (extravagant)

* Benjong mapang soruchioker karibo chiyongtsü tashonshia amshir.

OLONG PAITEP # 6992

1						2			3
								4	
5		6				7			
8									9
								10	
		11			12				
13									
14					15				
				16					

TIPLÉN

- | | |
|--------------------------|-----|
| 1. O jembitsü tashi | - 8 |
| 5. Sungjang tapu ka | - 5 |
| 7. Tekanük nung enokba | - 5 |
| 8. Teka amtep | - 5 |
| 12. Tzük asendak | - 5 |
| 14. Tsüngpang tema aliba | - 5 |
| 15. Ken atenba yimya | - 5 |
| 16. Asangur | - 8 |
- | | |
|--------------------------------|-----|
| 1. Tepok telung nung shilem ka | - 7 |
| 2. Tamajung aküm | - 5 |
| 3. Chi den külemi achiba | - 3 |
| 4. Meimchir alimai aruba | - 3 |
| 6. Laishiba nung ayong ka | - 4 |
| 9. Tarutsü nükla | - 7 |
| 10. Tamendakdak/Nükjidong | - 4 |
| 11. Tenük-telen mejungi aküm | - 5 |
| 13. Terok nungi adokba | - 3 |
| 14. Meimchir telemsa | - 3 |

OLONG PAITEP # 6991 TELANGZÜBA**TIPLÉN :**

1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioctsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua, 5. Mitsüksü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER MA

Madhya Pradesh kubok Neemuch nung anogo 9 nü Bhairav Ashtami Festival nung otsü tasen ka yanglutetogo. Iba benjung nung 84,000-square-foot Rangoli ka yangluba Indian Book of Records aser Asia Book of Records nung züluokogo.

Rangoli nung India sobaliba senmang, guru aser national heroes sayua yanglu aser iba ajanga global map nung Neemuch densemogo.

Iba benjungmong nungsa Lord Bhairav nem mitai tapu 2024 tashi tenla agütsüba atema world record ka yanglúa liasü.

Mizoram CM Lalduhoma-i Northeast Mini Jamboree tenzüksü**Aizawl, November 24, 2024**

(Agencies): Mizoram Chief Minister Lalduhoma-i Aizawl nung Bharat Scouts and Guides atema 8 buba Northeast Mini Jamboree tenzüksügo.

Iba sentong ya Mizoram State Training Centre, Tanhril nung agir aser linük kubok tesem balala nungi nisung 300 shi adener.

Lalduhoma ya Mizoram Bharat Scouts and Guides-i iba movement tejakleni bener aotsü bendanga agüja

President lir aser iba Jamboree tesentaktep tashi itshitsü teimla aliba lemsatep.

Sobaliba aser oshi balala stiaka linük tajungba akümtü atema telongjem aser kati ka angatetteptsüla ta paisa ayongzük.

Mizoram Bharat Scouts and Guides-i iba movement tejakleni bener aotsü bendanga agüja

inyakba atema Chief National Commissioner, Dr. KK Khandelwal pelaba metedtakstsü.

Chief Minister Lalduhoma nem kobi melii akhümket Silver Elephant Award agütsütsü ta pai ashi.

Mini Jamboree ya November 28, 2024 tashi alitsü aser iba mapang activities aser programs balala agütsü.

Manipur nung tanünungi School & Colleges nung class tenzüksü**Imphal, November 24, 2024**

(Agencies): Manipur sorkari November 25, 2024 nungi school ajak nung akhi ama class tenzüka agitsü metedtakstsügo.

Manipur nung law & order tensa tajungba akümba sülen iba tetuyuba agütsügo.

"November 25, 2024 nungi Government, Government Aided, Private aser Central Schools ajak nung class tenzüksü" ta Education (School), Manipur Director L Nandakumar Singh-i ashi.

Department of Education-Schools, Manipur kubok Zonal

Education Officers-i pei pei telongtet nung iba osang prokshitsü aser nüngdakba mapa inyaktsü tetuyuba agütsü ta Nandakumar-i ashi.

Manipur kubok Imphal Valley nung November 16 nungi 23 tashi kaketshirtem, tesayurtem aser staff lendong nungi kümzüka ayutsü atema schools, colleges, aser universities ajak shibanga liasü.

November 16 nü MLA tem ki amakba aser kiojen raksatsüba nung shilem agir nisung 6 tashi Manipur Police-i puogo. Parnok rongnung tanur ka densema lir.

November 22 nü iba ken o dak

sendakba nung Kakching district nung nisung asem-Mayanglambam Harison Singh (28), Wahengbam Samson Singh (32), aser Yengkhom Chandrashekhar Singh (57) nunger apu.

Iba tasüngji police-isa Imphal West nung nisung asem-Mutum Rojen Singh (28), Laishram Bijoy Meetei (21), aser Jameson Thokchom (20) nunger den tanur ka dena apu.

November 16 nü MLA tem ki amakba aser rongdokstsüba dak sendakba nung Manipur police-i tang tashi nung nisung 41 pua lir.

Guwahati nung auyaba atema Uber driver ka dena auer 7 apu**Guwahati, November 24, 2024**

(Agencies): Assam kubok Guwahati nung tesem balala nung auyaa senzür telok ka puogo.

Latasil Police Station-i bushisüngdanga aruba sülen auer telok apu. Parnoki Guwahati yimi nung tesüiba ita ishika auyaa aru.

Parnoki auyaba rongnung ka CCTV nung tangok aser ibaji media balala nung prokshia liasü.

Police-i iba footage nung ajemdaker bushisüngdang ka tenzüka liasü aser temulung meleme bilemer tsüngsü bushiteta liasü.

Auer telok nung züngsem 6 lir aser parnok pungu tashi Darrang kubok Dalgaon nungi lir.

Auer kabot Uber nung cab driver lir aser parnoki mapang shia tasa atonger Guwahati-i aru. Idangji parnoki auya aser iba sülen kidangi meyipa ao.

Police-i apuba auertemji Sadek Ali, Akbar Ali, Lokman Ali, Abu Bakkar Siddique aser Saidul Rahman nunger lir aser parnok ajak Darrang district nungi lir.

Police-isa Dilwar Khan ta ser nisung ka puogo aser pa ket nung auyaba osettem liasü. Tesüiba nunga Dilwar ya kasa ken o tem nung asemen tashi puogo.

MULUNGNEN O



Onoki teti dang meima aliba tsürabur **Asür Nungshi Ao**, Mokokchung Yim, pa shiranga aliba mapang aser 16th Nov. 2024 nü iba alima nungi pila aoba anogo ozü mangyim jashi mulungzürep tia nung alidak sensosanger, kiyongkinar, ana aser talang nungi temba tinu kwinakati nübu, rongsen aser sarasadem agi nungita yaritepogo, nenok ajak dang kanga dang pelaba iba zülü ajanga lemsateper.

Tsüngremi nenok kija taküm aser kibongtem tali moajangma ta onok sarasadem.

Temeim Kinungtsü, Chirnur aser Semchir.

Israel-i northern Gaza amakdang pua aliba tetsür ka tepset: Hamas

Gaza City, Yimpoksüi/Nov. 24 (Agencies): Israel-i tang tashi Gaza nung lir aser tanen makai military item rongnung nisung 34 operation agia aser tepsetogo, ta army-i ashir. Deobarnüa Gaza City nungi Palestine nunger ainshitsü totuyuba agütsür aliba mapang Israel-i Gaza north tsütsü amakdang pua aliba tetsür ka tepset, ta Hamas indang armed wing sangdong ka ajanga ashi.

Honibar nikongdang nisung meyirijang aika Israel nung pua alir choiktsü khanga longkak aita liasü. Israel sorkar dang pua bener aoba tanüngba nisungtem takum kidangi anir shilangtsü asoshi tezungzütep tasen ka yangluang ta nüburtemi khanga arur. Taoba küm November ita hopta ka rara anena alidang Israel nunger 80 dener nisung 105 chiok aser iba melen Palestine nunger tepuokdak alir nisung 240 chioka liasü.

Abu Obeida-i sangdong agütsüba nung iba tetsürla indang tejangja mesüra la komasür kodang tepsetar shia mali.

Abu Obeida-ia ano tetsür pua alir ka takum lendong nung lir ta ashi aser Israel nunger pua alir takum samaba ya Ato Kilonser Benjamin Netanyahu aser par army lenirtem tai, ta ashi.

Israel mitkari iba osang ya shidak mesüra tai ta meshiteter ta ashir.

Hamas-i tepseter aliba indang video footage ka sayaba süle Israel army-i bushisüngdang sütar ta sangdong ka nung ashi.

"Army nungi teshimet nisung temi lar kinunger den osang agiteptar aser parnok nem anguba osang ajak agütsütar," ta sangdong nung ashi.

Hamas-i taoba küm October 7 nü Israel south tsütsü amakdang nisung 250 shi pua bener ao, ta Israel ketdangsür temi ashir. Parnok rongnung Thailand nunger 23, Nepal nunger ka aser Philippines nunger ka densema liasü, shirnok Israel nunger 44,000 dak tema tepsetogo.

Taoba küm Hamas-i Israel amakdang nisung 1,139 asü, timba civilian liasü. Iba sülen Israel-i Gaza nung Palestine nunger azünger mesüra mapa inyaker liasü.

Khan busemertemi longkak mait tsüngda Pakistan yimtiba mokdang

Islamabad, Yimpoksüi/November 24 (Agencies): Taoba Pakistan Ato Kilonser Imran Khan tepuokdak nungi choiktsü khanga linük ajunga nung longkak aitba nung shilem ka ama pa busemertem linük yimtiba Islamabad-i aitsü sentong aliba nokdangtsü atema yimtiba mokdanga yuogo.

Security dak sendakba nung mepetmesü adoktsü ta bilemba tesemtem nung ketcangsürtemi mobile aser internet service shibangtsü, aser opposition Pakistan Tehreek-e-Insaf (PTI) party-i ayongzükba longkak aitba sentong metenzük tsüngda Islamabad-i aoba highway tem nokdanga yujo liasü.

Islamabad nung tongtibang lenmangtem timba sorkari shipping container tem amshia nokdangogo aser iba den riot gear semer police aser paramilitary personnel tem aika yokogo. Longkak aitertem parliament tonga meyoktsü nükjidong nung sorkari iba jenjang agiogo.

Temzung özüng dak ajemdaker lokti senden kecha ayongzükba magitsü tenokdangba agütsüogo, ta Islamabad police-i sangdong ka ajanga metedaktsü.

PTI takhangbatem rongnung Khan densema parnok lenirtem ajak tepuokdak nungi choiktsüba aser Ato Kilonser Shehzad Sharif-i aniba sorkari parnok mapa tokstsüba densema li. PTI-i, taküm küm tetenzülen agiba election nung ochi mashi inyakyim sendaka lir, ta shia sorkar anentsü takhangba agütsüogo.

"Khan-i, onok takhangba ajak mataloktsü tashi nokdaktsü ayongzükogo," ta Khan nem

teyari agütsür aser Khyber Pakhtunkhwa province chief minister Ali Amin Gandapur-i Honibarnü video osang ka ajanga metedaktsü.

Gandapur-i anir longkak aitlokli tulu ka Islamabad-i aitsü imlar. Pai nüburtem dang yimtiba Islamabad-i aitsü sentong aliba nokdangtsü atema yimtiba mokdanga yuogo.

Islamabad indang red zone nung linük indang parliament ki, tongtibang sorkar ki tem aser embassy balala den bendanger institutions' office tem amenoka lir.

Pakistan nunger ketcangsürtemi Honibar aonung menor ashiba agi, communication services tem linük kubok tanungba tesemtem nung taoba mapang ama dang inyaksangshitsü.

Parnoki iba tekokdangba ajanga koba tesemsa kongshitsü mesüra iba tenokdangba ya kobika atema benoktsü iba indang osang tejangja magütsü.

Global internet watchdog NetBlocks-i ashiba agi, ketcangsürtemi social media sabang balala tenokdangba agütsüogo aser VPN service tem daka rangloker jenjang agiogo.

Taoba ita Ketcangsürtemi, pro-Khan rally nung tetsükdaktsü adokdaktsü atema Islamabad aser Rawalpindi nung mobile phone services shibangja liasü.

Iba tenokdangba agütsüba

ajanga banking, ride-hailing aser food delivery amala anogoshia inyaksangshiba service tem dak kongshia liasü.

Khan tepunodak nungi choikdaktsü atema takhangba agütsütsü asoshi pa pusemertem social media dak metaloker inyaksangshir aser sentong balala dak sendakba nung osang tejangja agütsütsü atema WhatsApp amala sabangtem amshia arudar.

Khan ya 2022 küm parliament nung vote of no confidence ka agiba sülen PM mapa nungi atsüngtoka liasü.

Iba sülen sorkari pa sorkar anema nokdaktsü ajungmesoba aser kiralongraraba densema ken o balala nung aija tepuokdaki yokogo.

Khan nem bail agütsüogo aser ken o aika nung taitok agütsüogo, ajisüaka pa manemi tepuokdak yua lir, koba PTI-i ashiba agi, pa tashi dangi meyipa marudaktsütsü atema tasa asaba ka lir.

Khan aser par party-i pa anema benokba ken otem ya shitak masü aser yimden yimsüsüba dak ajemdaker pa inyaksangshi mesüdaktsütsü atema asa-a inyakba lir.

Cricket asayar ka aliba nungi yimden yimsüsür akümsang ya linük nung nüburtem aikati kanga sakloka lir. Taoba küm May ita pa mapang tatsüka sota ayuba mapang PTI pusemertem linük ajunga nung longkak aitba sentong ayongzükba agia liasü. Iba sülen longkak aitertem state meyong kitem aser military installation tem amak aser nisung meyirejang aika pua liasü. Ajisüaka nisung 100 shi dang military trial-bo agia liasü.

Trump-i cabinet züngsem ajak shimogo



Washington, Yimpoksüi/Nov. 24 (Agencies): US tir inyaktsü shima alisang Donald Trump-i secretary of agriculture atema Brooke Rollins shiba ajanga pa indang cabinet züngsem shimba maparen tembangogo.

"Asen indang Secretary of Agriculture ama Brooke-i American Farmers kumzüka ayuba mapa anir inyaktsü, shirnok asen linük indang tongtiret lir," ta Trump-i sangdong ka nung ashi.

Rollins ya mapang talangka nungi Trump indang tembarama lia arur, aser la ya Trump bhukumba right-wing think tank

America First Policy Institute indang co-founder aser tir lir. Taoba mapang Trump administration nung la ya Office of American Innovation indang director aser Domestic Policy Council indang acting director inyaka liasü.

Rollins ya alu nung intet aser lanuwa nungi Future Farmers of America aser 4H (linük ajunga indang agricultural club) nungi shilem agia aru. La Texas A&M University nungi agriculture development nung Bachelor of Science degree angu aser mapang tatsüka lir lawyer ama inyaka liasü.

Ajisüaka parnok ajak ya Senate nungi agizüksüla.

Djokovic-i pa indang coach asütsü Andy Murray shim



Andy Murray

Yimpoksü/November 24, 2024 (Agencies): January ita Murray-i Grand Slam asem Australian Open nungi tenzükka Grand Slam kija asaya 25buba akoktsü merangba mapang Novak Djokovic-i pa den mapang talangka toktepa asaya aruba asayar Andy Murray pa indang coaching team nung züngoksemogo.

“Kü den toktepa asayartem rongnung tongtiba ka tang kü indang coach ama shimbä atema kanga pelar. Andy den season tenzüktsü yongyasete atar aser Melbourne kong künä kanga toktepa asayaogo iba asayamung nung pa kü den dena alitsü ya jangrademtsüka

Murray-i Grand Slam asem tashi koker lir aser pa August ita Olympics nung asayaba sülen asaya nungi anena liasü. “Ni iba mapa atema kanga jangra ademer aser tang temelensi adoka künä kasa telok nungi tokteptsü yongyasete atar,” ta Murray-i ashi.

“Taruba küm pa nükjidong ataloktsü atema teyari agütsütsü asoshi maongka agütsüba atema ni kanga pelar,” ta paisa ashi.

Djokovic-i X ajanga pa aser Murray na asayaba indang video ka lemsatep aser “pai

asaya nungi manennüi liasü,” ta zülutsü.

Arishi küm 37 tain asayar yagi otsüsütsa Australian Open 10 ben kokogo aser Melbourne nung final pezü nungbo pai Murray tsükdakja liasü.

Djokovic-i 2024 küm Grand Slam ka danga mekoktet aser pa tang rankings nung jenjang tenetbuba nung lir, ajisüaka pai Paris nung Olympic tebur kija asaya kokogo, koba pai ashiba agi pa indang career nung takok tulutiba liasü.

Australian Open semifinals nung Djokovic, Jannik Sinner-i tsükdaktsü aser Wimbledon final nung pa Carlos Alcaraz-i straight set nung koka liasü.

Murray asaya aliba mapang tenu 36 ben asayaogo aser Serbia nunger asayar yagi 25 ben koka liasü.

Asaya 36 nung 19 bo final nung ajurutebpa liasü aser item rongnungi ano asaya tenetbo Grand Slam final nung asayaba liasü.

Murray-i 2012 küm US Open final nung Djokovic set pongu nung koka mezüngbuba Grand Slam akok aser iba sülen küm ka lir pa ya British nunger asayartem rongnungi küm 77 nung mezüngbuba Wimbledon asayamung akokba asayar aküm.

India vs Australia: India temaba jenjang nung lir

Yimpoksü/November 24, 2024 (Agencies): India aser Australia na tang asaya aliba mezüngbuba Test nung tasemnübuba Yashasvi Jaiswal aser Virat Kohli nati century kaka azükba den anogo tatemi Jasprit Bumrah-i wicket ana agiba sülen India team temaba jenjang nung lir.

Iba sülen Australia captain Pat Cummins nightwatchman ama ait saka pa-a Mohammed Siraj-i ball aonba mapang bat nung ball tsükshir aoba second slip nung Kohli ajepzüka out süttsü.

Maneni Bumrah-i ball kanga junga ona pa indang tasembuba over nung Marnus Labuschagne out süttsü.

Iba sülen Kohli-i Perth indang Optus Stadium nung ya out mesüi run 100 yanglu aser India-i wicket 6 out sur run 487 yanglur aliba mapang asaya declare süa liasü.

Asaya akoktsü atema run 534 nüngdaka asaya tenzükba sülen Australia-i asaya junga metenzükteta Australia asoshi asaya draw asütsü mesüra akoktsü mapang peria lir.

Australia-i tang tashi nung innings pezübuba nung run timtiba menepbaji run 404 lir, koba parnoki 1948 küm July ita England den asayaba mapang menepba lir.

Ajisüaka pitch nung ball arakzüba aser ajokba memedemba ajanga asaya akoktsü atema India team jenjang tajungba nung toktsügo.

IPL auction: Pant crore 27, Rahul 14 & Iyer 26.75 agi alizükogo

Rishabh Pant



₹ 27 cr



Yimpoksü/November 24, 2024 (Agencies): Deobarnü Jeddah, Saudi Arabia nung auction mapang marquee list nung liasü aser pa indang base price sen crore 2 liasü.

Taoba küm pa lenisüba nung team asayaka Lucknow Super Giants puri pa meyipa magiba sülen KL Rahul ya IPL auction-i ia liasü.

Delhi Capitals-i toktsüba sülen Pant ya auction nung ajaki aginüba asayar ka aküm, saka Sunrisers Hyderabad aser Delhi Capitals na ajateta Lucknow Super Giants-i pa sen crore 27 agi alizüka liasü.

IPL nung tang mezüngbuba Pant Delhi Capitals nungi masü saka tanga team ka nungi asayaba angutsü. Taoba küm Australia nunger pacer Mitchell Starc ya Kolkata Knight Riders puri sen crore 24.75 agi alizükba sülen pa ya IPL nung sen timtiba agi alizükba asayar kümä liasü.

Asaya tanabuba shilem tenzüker minute tenetbuba nung Solanke-i agütsüba ball ka Porro-i idakja liasü.

Iba sülen Haaland-i goal ka tera agi dang midaktsü aser pai metsüba ball ya crossbar nung ondaka liasü.

City pur goal idaktsütsü atema meranga asayaba mapang ka nung Johnson-i Tottenham atema goal pezübuba idakja parnoki asaya akok.

BILEMDANGANG

“Tangar den medemdanga lira temulungsüa malitsü.”

Tottenham-i goal 4-0 agi Manchester City kokogo



Yimpoksü/November 24, 2024 (Agencies): Deobarnü Etihad nung Tottenham aser

Tottenham-i goal 4-0 agi koka, City pur asaya 52 tashi kidang khen danga tamakok mongui arua aliba tembangtsüogo.

Asaya mezüngbuba shilem nung James Maddison-i minute tenet tsüngda goal ana idaktsü aser iba sülen Pedro Porro-i goal ka aser Brennan Johnson-i-a goal ka idakja parnoki iba asaya ayong ayonga koka liasü.

Iba asaya makokba ya 2022 World Cup masüdang nungi kidang asaya ka nung danga tamakok mongui arua aliba City atema mezüngbuba tamakok liasü, aser parnok Premier League nung temaba jenjang nung aliba Liverpool dang nungi point pongu agi tajemba kümogo. Liverpool pur parnok

Iba asaya akokba ajanga Tottenham aser Ange Postecoglou nem anisüngzük agütsüogo aser parnok Premier League nung nung trokbubai asaya tuogo.

Tawa 2027 küm tashi atema tenangzüktebpa yanglushiaka Pep Guardiola atema pa indang career nung tang ya mapang tamajungtiba ka ajangshia aoba mapang ka lir.

Guardiola den tenanzüktebpa tasen yanglushiaka sülen Premier League pezüben atonga koker aliba team ya asüngashitsü akok ta imla liasü, saka imlabä ama parnoki masayateti arudar.

Asaya metenzük tsüngda Rodri-i pa indang Ballon d'Or trophy parnok pusemertem dang sayu aser iba mapang Etihad pitch nung pa tenüng illuminate stüja liasü.